



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8

Israel-i Rafah amakba US-i dang soita yutettsü: Palestine PM

Williamson lenisüba nung New Zealand team T20 World Cup asayatsü



VOL. XXI ISSUE NO. 197 (ADOK 197) DIMAPUR SANGTENNÜ (TUESDAY) RONGCHII (APRIL) 30, 2024 ₹ 5.00

May 4 nü Kma nung sorkar office sodi agütsür

Dimapur, April 19, 2024 (TYO): Nagaland sorkari May 4, 2024 nü Kohima nung state sorkar office ajak sodi anogo asütsü metetdaksüogo.

February 24, 2024 nü Kohima nung sorkar office ajak nung mapa inyakba melena May

4 nü sodi agütsür ta General Administration Branch-II-i ashi. Nagaland Legislative Assembly indang session 4 buba aliba atema February 16, 2024 nü Home Department-i February 24 Honibarnü sodi magütsütsü osang metetdakja liasü.

DoSE-i takok angur nem tenüngsang agütsür

Dimapur, April 29, 2024 (TYO): Department of School Education (DoSE)-i HSLC aser HSSLC Examination 2024 nung takok angur ajak nem tenüngsang agütsüba metetdaksüogo.

DoSE-isa Government Higher Secondary Schools nungi HSSLC (Arts) 2024 toppers angurtem nem tenüngsang balaka agütsüba shisemogo.

Taküm sorkar school tem nungi tematiba jenjang takok angurtemji Mayangnokcha Government Higher Secondary School, Mokochung nungi Biseli Sangtam (Top 5a), Government Higher Secondary School, Chumoukedima nungi Ilamguale A Zeliang (Top 5c) aser Bating

Government Higher Secondary School, Longleng nungi Chujai P. (Top 8) nunger lir.

DoSE-isa nija school tem nungi toppers, subject toppers aser tesem balala nung 100% pass result secured schools ajak nem tenüngsang agütsüba metetdaksüogo.

Takok tajung anguba atema department kanga pelar aser nenoki takok anguba atema nüma atanger aser moatsür ta DoSE-isa metetdaksüogo.

Bendanga agütsüba tesayurtem, school tekolakpurtem aser field officers-i anibelem arema kaketshirtem tajungtiba kümdaksüba atema kanga pelar ta DoSE-isa shisem.

Northeast nung tzunglu kanga arutsü: IMD

Guwahati, April 29, 2024 (Agencies): India Meteorological Department (IMD)-i Northeast state tem nung yellow aser orange alerts metetdaksüogo.

Assam nung mopung adoka lir aser Bihar anüdoklentep tsütsü nungi Manipur leni mopung talem aoner ta IMD-i ashi.

"Taruba anogo 5 tsüngda Arunachal Pradesh, Assam, Meghalaya, Nagaland, Manipur, Mizoram aser Tripura nung tzunglu

arutsü, tsüngi aitsü aser mopung tesashi (40-50 kmph) aontsü" ta IMD-isa metetdaksüogo.

April 29 nungi May 1 tashi Arunachal Pradesh, April 30 nungi May 1 tashi Assam o Meghalaya aser May 1 nungi 3 tashi Nagaland, Manipur, Mizoram o Tripura nung tzunglu kanga arutsü.

IMD-i April 29 nungi May 1 tashi Northeast nung 'yellow alerts' aser May 2 nü 'orange alert' metetdaksüogo.

ULBs election atema 'Election Programme' adokogo; MCC tenzüker

Dimapur, April 29, 2024 (TYO): Nagaland Municipal Act 2023 nung lateta aliba ama Municipal / Town Councils tentettsü atema State Election Commissioner-i 'Election Programme' metetdaksüogo.

Nagaland sorkari Municipal / Town Councils election agitsü mulunga agizükogo aser iba

nung tetsürtem nem lemzüksüba wards dena lir. Iba nung ajemdaker Nagaland Municipal Election Rules, 2023 nung Rule 20 nung lateta aliba ama Nagaland nung Municipal Councils 3 aser Town Councils 36 atema 'Election Programme' adokogo ta SEC T. John Longkumer, IPS (Retd)-i

sangdong ka nung ashi.

'Election Programme' sangdongba sülen Nagaland nung Model Code of Conduct (MCC) tenzüker. MCC ya Municipal aser Town Council ajunga nung benoker aser iba kübok Nagaland nung candidates, political parties aser State sorkar adener ta SEC-isa metetdaksüogo.

SL NO	SCHEDULE OF PROGRAMME	DATE & TIME
1	Publication of Election Programme	29 th April 2024 (Monday)
2	Period for filing of nomination	7 th – 11 th June 2024 (Friday – Tuesday) [Up to 3 pm]
3	List of validly presented nomination papers shall be posted	12 th June 2024 (Wednesday)
4	Scrutiny of validly presented nomination papers	13 th June 2024 (Thursday)
5	List of validly nominated candidates shall be posted	14 th June 2024 (Friday)
6	Application for revision of the order of the Authority scrutinizing the nomination	15 th – 18 th June 2024 (Saturday – Tuesday) [Up to 3 pm]
7	Revision application filed shall be decided	19 th June 2024 (Wednesday)
8	Last date for withdrawal of candidature	20 th June 2024 (Thursday) [Up to 3 pm]
9	List of contesting candidates and list of polling stations shall be posted	20 th June 2024 (Thursday) [After 3 pm]
10	Date of poll	26 th June 2024 (Wednesday) [Between 7:30 am & 4:00 pm]
11	Date of re-poll, if any	28 th June 2024 (Friday)
12	Counting & declaration of results	29 th June 2024 (Saturday) [8 am onward, Counting Centre / Hall]

Eastern Nagaland-i ULB elections nung shilem magitsü

Dimapur, April 29, 2024 (TYO): Eastern Nagaland nungeri Nagaland nung urban local bodies (ULB) elections nung shilem magitsü osang metetdaksüogo.

Eastern Nagaland People's Organisation (ENPO)-i

Chenmoho bangzüng nung akangkanga noktaka lir aser June 26 nü ULB elections nung shilem magitsü ta metetdaksüogo.

Frontier Nagaland Territory (FNT) takhangba melanzü tashi Eastern Nagaland nungeri central mesüra state benjungbentsü

mesüra sentong kecha nunga shilem magitsü ta ENPO-isa ashi.

Eastern Nagaland nungeri central aser state elections kecha nunga shilem magitsü ta February 23 nü Chenmoho yimtsüng nung bangzüng renema aliba ama iba lemtet agir ta ENPO-isa ashi.

CNCCI-i mapang telatet makai shibangba anener; State sorkari mapa inyaktsü nangzüker

Dimapur, April 29, 2024 (TYO): Confederation of Nagaland Chamber of Commerce and Industry (CNCCI)-i mapang telatet makai shishilembabaren shibangba agienogo.

District Chambers of Commerce 16 aser executive council nungi temelaba agir CNCCI-i April 26 nungi mapang telatet makai shishilembabaren shibangba agienog ta parnoki ashi.

Dimapur Chamber of Commerce and Industry (DCCI)-i akhangba onüktem asoshi telanzüba tajung nguogo ta ashiba den state sorkari khurettem koktetsü atema mapa tenzüko ta ashiba nung ajemdaker CNCCI-i mokdang agienogo.

Sorkari tetuyuba agütsüba aser lemtet balala agiba ama mapa inyaktsüla. DCCI-i benokba onüktem ya Nagaland ajunga atema lir ta CNCCI-isa ashi.

State sorkari shishilembartem khuret süoki ia agizükba atema tenüngsang agütsür. Cabinet

senden jatepa iba khuret lemsatepba atema pelar. Külen Deputy Commissioner aser Commissioner of Police-i DCCI tenüng nung anibelem arema inyakba atema tenüngsang agütsür ta CNCCI-isa ashi.

CNCCI-isa district units, kin hohotem, CSOs, talisa Naga Council Dimapur aser public-i tax saruba aser tashiyim agi sen meshiba anema ayongba sentong pusema nungitba atema kangasa pelaba metetdaksüogo.

State sorkari mapang shitak nung mapa inyaktsü nenshir kechiyong 2021 nung Department of Urban Development and Municipal Affairs nem takhangba agütsüba agizüka meinyak lir ta CNCCI-isa ashi.

"Sorkari tangsa CNCCI takhangba atema nendaka mapa inyaktsüla mesüra onoki state ajungalen nungi ola adoktsü" ta CNCCI-isa metetdaksüogo.

DCCI-ia tanga sangdong ka ajanga April 30, 2024 nungi

Dimapur jila nung shishilembadak ajak lapoktsü metetdaksüogo.

DCCI-isa shishilembartem dang jenjang tur mayoktsü tetuyuba agütsüogo aser parnokisa aibelenertem merenshitsü metetdaksüogo.

Nagaland sorkari ozüng alema tax saruba mesüra telok mesüra kijatemi tashiyim agi sen meshiba magizüker ta metetdaksüogo.

DCCI-i April 27 nü Chief Minister dang onük pungu asüngdangba langzudang Home Commissioner Vikieyie Kenya-iba ya metetdaksüogo.

Nagaland nung telok balalai tashiyim agi sen meshiba aser ozüng alema inyaksangshiba state sorkari azüoktsü nangzükogo ta pai ashi.

Shishilembartemi NPGs nem GST mesüra Taxation agütsütsü asü ta DCCI-i asüngdangba atema "shishilembar telok mesüra kijai GST mesüra tanga ozüngi melaba tax ajak state sorkar nem

dang agütsütsü" ta Kenya-i langzü.

State sorkar kübok statutory bodies/ law enforcement agencies-i dang ozüng den meputepertem jaoktsü tashi lir ta DCCI-i takhangba agütsür anogo tasembuba nung sorkari telanzüba agütsüogo.

"Telok/kija kari summons asütsü ozüngi memelar aser timtem ajururtemi ozüng amertem dang nungi teyari meshitsü akok ta Kenya-isa ashi.

Ozüng amertem dang mita aotsü akok aser tangari iba mapa inyakbaji ozüng alema lir. Iba ama ajurudang timtem ajururtemi ozüng amertem dang nungi teyari meshitsü akok ta state sorkarisa langzükogo.

Transport pur dang tashiyim agi sen meshir, pur aoertem aser len tom nung mapa tamajung inyaker dak taochi kecha melii mapa inyaktsü. Iba atema state sorkari police aser district administration nem tashi ajunga

agütsüogo aser ken o benokba shia mapang shitak nung mapa inyaktsü tetuyuba agütsüogo.

Ibala mapa inyaker anema ozüng tapet aser National Security Act kübok ken o benoktsü ta Home Commissioner Vikieyie Kenya-isa DCCI dang langzükogo.

Home Commissioner-isa DCCI aser CNCCI dang item onük nung ajemdaker mapang telatet makai shishilembabaren shibangba agientsü mepishia metetdaksü.

Kohima Chamber of Commerce & Industries (KCCI)-ia mapang telatet makai lungkak aitiba anenba osang metetdaksüogo.

DCCI-i April 26 nungi mapang telatet makai dokantem shibangtsü ayongba pusema KCCI-ia kasa anogo nung ghonda 12 mokdang ayonga liasü. Ajsüki CNCCI-i state ajungalen shishilembabaren shibangtsü ayongzükba den külemi KCCI-ia Honibar nungi iba sentong tenzüka liasü.

Rubber Tapping & Processing training temogo



Dimapur, Rongchii/April 29 (TYO): Rubber lu ayimba ya aluyimer takumjenjang tajungba kumdaktsütsü lenmang tajung aser yimdak yimtsüing nung employment adokdaktsütsü tesem ka ta angateta, Rubber Board of India nungi maneni yaria Department of Land Resources, Nagaland ajanga aluyimer nem technical tsütsü teyari balala agüja arur.

Nagaland nung tang ali tasazük 19132.5 Ha nung rubber tsünüa lir aser 14100 Ha rubber yimzüksü/agizüksü mapang tongogo.

Rubber tedong mapang talangka mesüi lidaktsütsü aser ngisa tajungba nung agizüktsütsü asoshi rubber lu ayimer nem scientific aser technical shisatsü agütsütsü nüingdak ta ajiteya department-i training agüja arur.

Iba yongji department ajanga

Rubber Board of India Regional office, Dimapur den lungjemer Tappers' Intensive Skill Improvement Programme for Rubber Farmers kübok Scientific Method of Rubber Tapping & Processing indang training agüja arur.

Training ya phase asem lemsar agüja arur aser mezüngbuba phase ya March 18 nü tenzük aser tasembuba phase ya April 27, 2024 nü tembanga liasü.

Iba mapang Chümoudekima district kübok Ruzaphema nung aliba department indang Resources Centre nung rubber tsünüba district ajunga nungi rubber tsünüir nisung 45 nem training agüja liasü.

Mezüng batch ana nem RBI ajanga technical tsütsü yaritepa liasü. Ajisüaka batch tasembuba nung department-i training ya

in-house trainers ajanga agüja liasü.

Honibarnü phase tasembuba training tembangba sentong nung Additional Director, Land Resources aser Assistant Development Officer, RBI Dimapur nungeri training agirtem den jembia liasü.

Iba mapang Rubber Board ajanga yariba atema department tenüing nung Additional Director ajanga pelaba lemsatop.

Pai training agirtem dang pei aliba tesem nung training agütsür ka-ka akumtsü ayongzük aser pei aliba clusters/district nung training agir alirtem master trainers kumdaktsütsü aser iba mapang department-i yariteptsü ta ashi.

Assistant Development Officer-i rubber lu ayimer dang süngdong arishi talang alitsü mechi anogoshi ngisa agizükba anentsü ajungshia liasü.

RBI-i maneni department ajanga akok tashi yariteptsü, ta pai ashi.

Training nung adener temia training nung shisatsü balala angazükba lemsatop aser department dang pelaba shia liasü.

Iba sentong nung District Project Officer, Land Resources, Chümukedima menden liasü aser Project Officer Directorate ajanga melepzüng o jembi.

Dhansiri ayong nung teburchanu tasü mang ka ngutet

Dimapur, Rongchii/April 29 (TYO): Dhansiri ayong nung tanur chanu tasü mang ka nguteta lir ta April 28, 2024 nikongdang 5:45 ako meta East Police Station, Dimapur dangi telephone ajanga osang arua liasü.



Iba osang angashili duty nung alirtem New Life Bible College tsüinglanglen aliba Dhansiri ayong tonga ao aser yangji nisung tasü mang ka rempangshi tzüma nung bongdaka aliba ngutet, ta Dimapur Police sangdong ka ajanga ashi.

Iba tanur ya tebur aser tar 54cm shi talang liasü. Ozüing agi melaba maparen ajak tembangba sülen tasü mang ya

PM examination/identification atema District Hospital Dimapur morgue nung bener oa lir.

Iba tanur ya masodang/asoba mapang asüba (stillbirth) südi ta temulung melemteti lir.

Kibur/kinunger temi Officer-in-Charge, East Police Station, Dimapur den Mobile No. 7085055020 ajanga tongteprateptsü akok, ta sangdong ajanga ashi.

Northeast nung maneni tzüinglu arutsü

Guwahati, Rongchii/April 29 (Agencies): Northeast nung aliba state tenet - Assam, Manipur, Meghalaya, Nagaland, Mizoram, Tripura aser Arunachal Pradesh - nung ano maneni anogo pongu tzüinglu aser yipru arutsü takzua lir, ta Guwahati nung aliba Regional Meteorological Centre ajanga ashi.

indang takzuba nung Northeast tesem timba nung tzüinglu nanatsü aser kar nung tera timba aser tesem kar nung ano kanga sashia arutsü.

Northeast Assam aser temeket nung 'cyclonic circulation' aliba ajanga tzüingsang ya majungtsü, koba mean sea level nungi anüinglen kilometre 1.5 aser 3.1 tur lir, ta ashi.

April 29 nungi May 3 tashi



Libajen wazüka ayuba nunga nendaka inyakba temaitsü sayua Assam Rifles temi April 29, 2024 nü Selouphe village nung süngdong atemba sentong ka ayongzuka liasü. Iba sentong nung Selouphe yimtsüing nungi GBs aser council chairman-i anir nisung 30 shi arua süngdong aika atem.

Longleng nung World Veterinary Day amung

Dimapur, Rongchii/April 29 (TYO): Veterinary Hospital, Longleg nung "Veterinarians are essential health workers" omen kübok April 27, 2024 nü World Veterinary Day 2024 munga liasü.

Iba sentong nung Dr. Lily Nguillie, ACTO, KVK Longleng ajanga anogomung ratet ashi aser Dr. Aoyimsen Jamir, VS Longleng & V.P.,NVA ajanga omen nung ajemdaker jembia liasü.

Dr. Asungla Imchen, Epidemiologist, Medical department ajanga iba sentong nung jembidang, Veterinary

Department nungi teyari medeni 2030 tashinung Rabies tashidak samatsütsü nükjidong atongtsü kanga tasak asütsü, ta ashi.

Forest Ranger, Chepeü Koza-i sentong nung adeneritem dang 'one health concept' asoshi maneni meranga inyaktsü ayongzük aser Forest department ajanga arem shiruru kumzuka tesem balala nung belenshiba mapang veterinarians temi shilem tulu agiba atema pelaba lemsatopa liasü.

Laisa Forest department nung item inakyim indang awareness aser health care

agütsütsü ajungshia liasü.

Longleng Town Council kübok Longleng nung azü tenüing bendena azüokba mera agiba mapang Veterinary department-i yaritepba atema LTC nungi Issac Pongshi-ia tenüingsang agüja liasü.

Iba sentong nung Dr. Mophe B.Phom, VAS (MVU) menden liasü aser Dr.L.Bongtok Phom, VAS Tamlu ajanga melepzüng o jembi.

Maneni Longleng Town Council, KVK, Medical aser Forest departments nungi teshimtet nisungtem sensaksemba mapang liasü.

Assam Rifles temi Mon nung hadir aika apu



Dimapur, Rongchii/April 29 (TYO): Itdangiterba osang tejangja kar nung ajemdaker Assam Rifles temi April 29, 2024 nü Indo-Myanmar arütsü anasa Mon district nung tesem kar meita aoba mapang nisung ka apu aser 11 Mortar tubes (81mm), 04 Tubes (106mm), 10 Pistols, 198 Hand Held Radio

Sets, satellite phone ka, Kenbo bike ka, Bolero gari ka aser raradang amshiba mesük osettsüset tem nguteta liasü.

Assam Rifles temi arütsü shibangtsü meranga operation agiba mapang arütsü anasa iba ama osettsüset ngutetba ya takok tulu lir.

Ajidang masü region nung

tesunep meinprongtsü meranga tasa tamajung yanglur asoshia takoksa tulu alitsü.

Sepaitemi amshiba nok-nü aser hadir 200 dak tema ngutetba ya tebilemba tamajung aliba amai ajiteter.

Iba operation nung apuba nisung den osettsüset ya Nagaland Police nem agütsüogo.

Longnak-Mangkolemba lenmang atema metetdaksür

Dimapur, Rongchii/April 29 (TYO): NESIDS kübok Longnak - Mangkolemba road, Mokochung tang teyangludak atema Right of Way (ROW) nung kongshiba tesem nung T.A Kubzar petrol pump Mangkolemba nungi Mangko ward junction tsüingta ki o jen aser osettsüset yua aliba ajak

May 5, 2024 tashinung agientsü metetdaksür, ta ADC Mangkolemba, T Lankosen Tsanglao-i sangdong ka nung metetdaksü.

Ano sorkar meyong electric towers, poles, pipelines mesüra danga ki o jen ajak tekeraba nung agientsü, ta sangdong ajangasa ashi.

Tanü Faith Theological College graduation sentong agitsü

Dimapur, Rongchii/April 29 (TYO): GPTAM, South Korea ajanga accredited asüba aser Martin Luther Christian University den tesendaktep nung lapoka aliba Faith Theological College, Dimapur indang graduation sentong April 30, 2024 nü agitsü.

jaoker ka ama Advisor, Information & Public Relations and Soil & Water Conservation, Imkong. L. Imchen-i shilem agitsü.

Iba sentong ya Ura Villa Colony, Dimapur nung aliba Faith Gospel Church nung anüingdang 11:30 nungi tenzüksü, kong tongti o jembir Rev. Dr. Wati Aier alitsü.

Iba sentong nung mejeta



April 29, 2024 nü Solapur nung Lok Sabha election nüboyim sentong ka nung Ato kilonser Narendra Modi aser Maharashtra Deputy Chief Minister Devendra Fadnavis na den BJP lenirtem tangokba noksa nung angur.

Congress sorkari nüburtem nüngdak sendoka aruogo: JP Nadda

Mahububabad, April 29 (Agencies): Hombarnü Telangana state kübok Mahabubabad nung Lok Sabha election nüboyim sentong ka nung jembidang BJP National Tir, JP Nadda-i Ato kilonser Narendra Modi nem tenüngsang agütsü aser opposition INDIA teloktep aija liasü.

JP Nadda-i, Rahul Gandhi Ato kilonser aküm asübo pai Covid wara aser chiyungtsü/ osettsüset jenjang atuba maziüoktetla, ta ashi.

"Onoki Narendra Modi asen Ato kilonser asütsü telemtetba agiogo. Ajisüaka INDIA teloktep nungi Ato kilonser candidate ji shiba?... Karibo meteta ali asü? Rahul Gandhi Ato kilonser aküm asübo pai Corona aser jenjang atuba aziüoktetla asü?, terenlok mapa inyakla asü aser alima nung tebilemstü onüktem agizüktetla asü?" ta pai asüngdang.

Paisa, parnok indang lokti senden nung menden ana azüngteta lir- menden ka taoba mapang Jharkhand Chief Minister, Hemant Soren aser menden ka ka AAP tongti lenir/ Delhi Chief Minister Arvind Kejriwal indang azüngteta lir, ta ashi.

"Tenaprongla ochimashi ajanga jail nung lir. Ochimashirtem ajak parnok kümzüksü atema longjemogo," ta Nadda-isa metetdaksü.

JP Nadda-i X ajanga, "Tamalen Telangana ya BRS sorkar kübok timtema liasü aser tang Congress-i kasaji inyaker. Telangana nung nüburtemi Lok Sabha election nung Ato kilonser Narendra Modi-i aniba tashitait sorkar pusemstü atema telemtetba agiogo," ta metetdaksü.

Paisa, Congress sorkari nüburtem nüngdak balala maneni sendoka aru, nüburtem

atema inyaksü melen parnok tebilemba ataloktsü atema dang inyak," ta metetdaksü.

"Telangana nüburtemi mangdang aliba lenir Ato kilonser Narendra Modi aser BJP sorkar nungittsü telemtetba agiogo," ta pai metetdaksü.

Lok Sabha election shilem pezübuba kübok Telangana nung Lok Sabha menden 17 atema May 13 nü election agitsü aser June 4 nü vote azüngtsü.

2019 küm Lok Sabha election nung Telangana Rashtra Samithi (TRS)-i state nung menden 9 tashi nung nung takok ngua liasü, Bharatiya Janata Party (BJP)-i menden pezü angu, Indian National Congress (INC)-i menden asem aser All India Majlis-e-Ittehadul Muslimeen (AIMIM)-i menden ka nung takok ngua liasü.

Rajasthan nung mosque ka nung Muslim nunger putir ka tepset

New Delhi, April 29 (Agencies): Rajasthan kübok Ajmer nung mejangjaba nisung aseme mosque ka nung Muslim nunger putir ka tepset.

Arrshi küm 30 putirji Uttar Pradesh kübok Rampura nungi liasü.

Honibarnü Ramganj kübok Kanchan Nagar nung aliba mosque ka nung Muslim nunger putir Mohammad Mahir tanur

trok den küleme amoi oa aliba mapang nung nisung asem mosque telung jagi aiba sülen süng amshia putirji zükset.

"Tebur chanutem jagi teyari meshia asatenba mapang nung mejangjaba nisungtem jagi parnok-a tepsettsü ta amokmerena liasü. Tanurtem nem phone ajanga teyari memeshidaksütsü atema parnoki putir indang mobile

phone-a bener oadok," ta osang ka ajanga metetdaksü.

Iba tatalokba dak sendakba nung tang tashi shinga mapu.

"Nisung tepsetba kuliji tang tashi nungbo mejangja. Police-i iba tesem nung aliba CCTV noksa repranga bushisüngdang tenzükogo aser Indian Penal Code kübok nisung tepsetba ken o ka benokogo," ta kasa osang ajangasa metetdaksü.

SECONDARY (10) & SR. SECONDARY (12)

ADMISSION & COUNSELLING
All EXAMs - ONLINE (BOSSE/MU)
BA/BA(H)/B.Sc./BBA/B. Com/BCA
MA/M.Sc.IT/M.SC/MBA/M. Com
DCA/PGDCA/B.Ed./D.El.Ed.

Call: 8413818142/9863318721/9774833646
Nagaland Rashtrabhasha Prachar Samiti

Supreme Court-i May 1 nü Arrla 370 ken o angadangtsü

New Delhi, April 29 (Agencies): 2019 küm Centre sorkari linük temzüng nungi Arrla 370 agientsü telemtetba agiba ken o May 1 nü Supreme Court-i angadangtsü.

Arrla 370 ajanga Jammu & Kashmir nem maongka balaka agüja liasü.

Yaküm December ita nung Supreme Court-i Jammu & Kashmir nung Arrla 370 agienbaji shidak dang, ta obendang agüja liasü, ajisüaka iba ken meyipa reprangshitsü

mepishiba sülen Court-i iba ken o tanaben angadangtsü telemtetba agi.

Supreme Court-isa Election Commission of India (ECI) dang taküm September 30 tashi

nungbosa Kashmir nung election ayongzüka agiang, ta tuyuogo.

Arrla 370 agienba anema temepishiba ken o 23 Supreme Court-i anogo 16 tashi angadanga aruba sülen tatembangsa yaküm September 5 nü angadanga liasü.

Kü den tokteper candidate shinga mali: Smriti Irani

New Delhi, April 29 (Agencies): Uttar Pradesh kübok Amethi Lok Sabha constituency nung Congress candidate shinga maliba dak sendakba nung Union Minister aser BJP candidate, Smriti Irani-i, kü den tokteptsüpur

candidate shinga mali, ta metetdaksü.

Irani-isa, shingaia Rahul Gandhi aser Priyanka Gandhi indang mejembir, ta ashi.

Lok Sabha elections tenzüka shilem ana tashi agiogo saka tang tashi Congress-i

Amithi Lok Sabha menden atema candidate tenüng mesangdonger. BJP-ibo iba menden nung tokteptsü atema Smriti Irani shimogo.

Osangbener den jembidang BJP candidate Smriti-i, "Shingaia parnok (Rahul & Priyanka) atema mejembir. Nisungtemi Rahul Gandhi aser Priyanka Gandhi atema mejembir. Ni anema tokteptsüpur candidate mali. Ni anema tokteptsüpur candidate ali nungang ni tokteptetsü," ta metetdaksü.

BJP-i linük temzüng raksatsüner: Lalu Yadav

Patna, April 29 (Agencies): Hombarnü Rashtriya Janata Dal (RJD) tongti lenir aser taoba mapang Bihar Chief Minister, Lalu Prasad Yadav-i, Babasaheb Ambedkar-i yangluba linük temzüng BJP-i raksatsüner, ta aitsü.

Saran nung election nüboyim sentong ka nung jembidang Lalu-i, "B R Ambedkar-i yangluba linük temzüng BJP-i raksatsüner. India nunger temzüng aser democracy raksatsü atema onoki memelatsü," ta metetdaksü.

Paisa, BJP-i backward nüburtem indang reservation anentsüner, ta aitsü.

"Parnoki backward nüburtem indang temeden agienadokner. Kechi südir süaka onoki ibaji memelatsü aser onoki longjemer nokdaksü," ta pai metetdaksü.

Hombarnep Lalu Prasad'er jala Rohini Acharya-i Bihar kübok Saran Lok Sabha menden nungi tokteptsü atema nomination file süogo. Acharya den Lalu Prasad,

tetsü Rabri Devi aser adianu ana- Tejashwi Yadav aser Tej Pratap aser party lenirtem liasü.

Osangbenertem den jembidang Tejashwi-i, BJP ya yazü jembirtem party ka lir, ta ashi. Paisa, NDA sorkari 2019 küm election mapang nung nangzükbatem meinyaker, ta aitsü.

Taoba mapang Bihar Deputy Chief Minister, Tejashwi Yadav-i, "'Mahagathbandhan' teloktepi Saran menden densema Bihar nung Lok Sabha menden 40 prongla nung takok angutsü. Ato kilonser Narendra Modi densema BJP lenirtemi parnoki state nung menden ajak nung tamakok angutsü, ta meteta dang lir," ta ashi.

"Bihar nung Lok Sabha election osang ajanga aika süngmangtsü, ta ni aiben jembia aruogo. Nüburtemi 'Mahagathbandhan' yaritsü. Ato kilonseri tesüiba küm 10 nung Bihar nung NDA sorkari inyaktetba indang jembitsüsa kecha mali," ta paisa metetdaksü.



April 29, 2024 nü Bikaner nung Bikaner Technical University (BTU) convocation sentong nung Rajasthan Angh, Kalraj Mishra adenba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, APRIL (RONGCHII) 30, 2024

Auer tapu aika

Nagaland nung ya Naga yimten nüchiso bushir telok balala aika kümteta aliba dang masü saka auertema tapu aika lir. Item auertem rongnung kari prangpong injang amshia rakzükratema auyar, kari office nung pen amshia auyar, kari laishiba amshia auyar aser kari light yindong nung pereploka aliba yinzü, yinpak aser bolto (nuts & bolts) dena auyar. Atangji, auertemji itemji dangbo masütsü saka yimkong timtemdaksüba auer tejangjatemjibo item telok pezüji dang asütsüa akok. Item jagi tedongzüng nung mena yur auyaba agi talaklen alirtem tangutsü tim mangu maparen aika nung timtemdaksür. Aji oda, asenok lenmang tamajung nung jajadaksüba, light junga manguba, shishilembadak jenjang tali tudaksüba, ayong agi meketbanga yur tzü tajemtsü peria manguba, aluyimertemi züsentetbatem meyoktetba, lanurtem zünger mapa mengutetba aser tamangertem agi tamangertem memesük akümba tebilemtsü ajak ya auertem jagi yimkong meyong tagitarutsütem auyaba ajanga adokdaksüba timtem aser takoksatem lir. Iba timtem aser takoksaji aremer maremtet Dimapur Chamber of Commerce & Industry teloki anir Nagaland nungbo yimti tulutem Dimapur, Chümoukedima, Kohima, Zunheboto aser Mokochung nung taoba anogo ana asem tashi shishilembadak ajak shibanga yur longkak aita mongogo. Atangji, tangari masü shishilembartemi shishilembadak shibangbaji peisasa pei akoksatsüsa inyakba mapa ka lir. Ajisüaka, kechianga mesayang, state government-i yimti nung ozüng raksartem anema ozüng mamshitetba agi peisasa pei mang nung zübo keta ain adok ama, tejashi marem shishilembartemi metetsümonga pei akoksa arema state government dang mepelaba sayuogo. Iba jagi state government terabo tekümdangba, teyakyakba aser teindangba akümtsü imlar. Aji oda, shishilembartemi peisasa pei akoksa arema longkak aitba ajanga shishilembartem dang nungibo nübortemang tajanzük tuluba angutsü, kechiyong kodang auer aser rakzükratemer melilir osettsüset aser jangotsü ajak jenjang dalangba nung angutsü. Ajisüaka, auertemi yimkong nem timtem takoksa agütsüba mapaji shishilembartem timtemdaksübaji dang masü saka auer telok ka lir aser item jagibo light yindong tongshi amai pereptepa tua yanglua akadak oagi yangji yinzü, yinpak aser bolto ajak rangzüka auyaa bener aoer. Iba jagi tan ita nung yasa Pungro nung Likimro Hydroelectric Project aser Wokha – Sanis tsüngda light bener aoba yindongtem nungi osettem auyaa bener aoba ajanga yindongtemji akanga nokdaka melitet laor light marutsüsa timtem atalokogo. Iba timtem aser takoksatemji yimti nung dang masü saka arem nung dena yin auyartemi auyaba ajanga agütsüba timtemtem lir. Atangji, item timtem aser takoksatem ya khen bilemtsübo auertem aliba jagi ataloker saka kodang jungjunga shisadangdir auertem aliba agi nübortem timtemer masü saka auertem mita aputsüsa state nung ozüng shitak amshir maliba ajanga timatemer ta angatettsü. Shin o nung ashi ama, pen ya noklangnok dang nungi tesashiba lir. Tetezü, pen ya prangpong injang dang nungia tesashiba, anungji pen agi prangpong injang amshia rakzükratemer aser auyartemji koka inyakteter. Ajisüaka, kodang pen amsangiang prangpong amsang dang nungi tuluba aser teimba auyatsü bilemdir, nübortem asoshi teimlaji yangji samar aser yimti agi auer tesepe akümtsü tenzüker. Idangji, prangpong amsang o pen amsang na tembar kümer nübortem meyong auyaba nungi pei pei shilem lemsaa agir aser tenapronglai Laishiba amsang nema agütsür. Iba jagi oda-odabo Laishiba amsanga teka, tenük aser temulungjang meshitak kümdaksür aser Tsüngrem meyong auyatsüa tetsübu tarendak melii akümer. Iba jagi tanübo asenok tenla kidang adenshiba ya auer telok adenshir amai ka kümadokogo, kechiyong yangji prangpong, pen, laishiba aser yin amshia auyartem ajak ajurutepa 'Tsüngrem sangang Pai moatsür' ta atener. Atangji, auersa asüyonga asenoka Yisu den kangki nung külemi angenloksang dak aliba tangatetba lilasang tadokbo ngula.

OLEMSABANG

KILEB KI

~ Süpongnüsang Longkümer, Darogapathar Dimapur

Ocet zülutsü ya temela masü, mekümtangra iba nungi ken ou sendaka lir aser tetsüputsü kaji Tsüngrem tsüngdang aipelenra aji atakatem anungji nai memulungra songtemang aser nai mulungba ka süra tanüla shisatsü agüjang ta sarasatemer tenzüker anungji metongshitsüba pela akizüksü. Kileb ya shiruru tila ka saka iba taküm yimya ya tanga shiruru dang nungi khen agi palaka pa ki yanglutang pa temang tiyep agi ali perepba telongi aitsü sünggrapö tepu agi mejetdanga aitsü aser telong nung tesepe yanglur pa chiyongtsü timbaka ajongmang (Ajongnem) nung aliba shipu kaktetta achir. Akidang tsürapor mapang Ak metsübaji Ak ki maka yimtong nung tang mejanga cü-a mashidak janadakja metsü. Anungji yimtong ajaklen teshinem agi senzüsemping majung liasü. Iba ama jika nungji iba kileb tiyepji yutsüra Ak cüji meküzür. Kileb ya kong senzütir iba anasaji paki alir anungji kodang pa arishitir yakta ki pushia air, anungji pakiji tua aitang pa nem mengudaksütsü atema tekiji ali agi nongbangja tua air mesüra pai asen ngura pai pa natzü ajemer. Kodang natzüji jemdir sheji tachi majung tako akümer. Tanur tashi mangertem dang Mojing meji chesu kilentzü merepdanga asütsü ta ajar, anungjiang kü meji nung nenok kanga timtemdaksüogo ta jemir. Iba dang nungi tamajungba nisung tang shijen shiaka manger metongshitsü jen metongshijaka meyipber angüpber dang kileb chesu ta ajar kechaser kilebi pa natsü jemra she tachi majung tako akümbaji bei sasa bei she mezümer (Mimer)

Samson otsü ya obendanger tapu 14 nungi lir aser ajaki metetba otsü asünungji tekong meinoktsür. Samson ya tetsü tapong ka ajanga asütsü Tsüngremi tsürapor dangi jongkai adoka azüngashia asuba Nazarit ka. Kechiba tapong??? Sari, Rachel-a aser Elizabet parnok ajak Tsüngrem mulung chidaksürtem anungji parnok ten Tsüngrem dena lir ta kuli agütsüba ta angatetter. Pa kolak nung kosunok meyoktsü, pa tetsüa sünga temesepba yi aser chiyongtsü kecha machitsü Tsüngremi metetdaksü aser taküm merüktetta aliba nisung asütsü Tsüngremi shimtet. Saka pai yi ajem, memejepdokba kin nungi kinungtsü tepushi ta tsürapori kangdang saka tashi manga. Dellilaji pa kinungtsü ta bilem saka tetong jagi pa südaksütsü tasa tamajung yanglu saka kü meimlai ni asoshi tasa tamajung atonger ta bilema maru tatemsa ku ajak mejepdoktsü iba mapang Tsüngremi pa doktsür liasü. Filistia nungeri pa poa arua tenük arokodokdaksü tesüsa pai Tsüngrem bilemtetta tashe mesheshir pa sendakba tongshi laodaksü dang Filistia nunger-a ki nung alir ajak asü aser pa-a külemi idakji asü. Mojingi yamaji lemlelemla molumi lenmangi anir. Paji Filistia nunger kokdaksütsü jatetba saka Tsüngrem nükitong pai yimdangi marue she jangraba inyak. Tsüngrem tenzükbaji she jangraba nung tenzükra tatembangji tatem mazü atemer Yi aser sun flower achertem arishi talang lang aliba alima nung mali. Aikati yi ji takar aser tular chiyongtsü ta jembir aji shidak ta angatetter asü? Tular aser takartembo she azü lenmang nung jajabaji konang asü? "Kechi kü chir, kü nu menden chir kechi? aser oh kü tezüngzükbaji chir kechi? Nü tashe tetsür nem tagütsü mesüra nü lenmangtem kobai chubatem samatsür. Oh Lemuel, yi ajemtsü chuba asoshi masü, aji chubatem asoshi masü, mesüra yimsüsürtemi temesepba yi mepushitsüla. Ashiko parnoki ajemtsü aser ozüngji amatsü, aser timtemer dang ochiba tsüa aliba meyipsatsü. Samatsü renema alir nem temesepba yi agüjang, aser taküm nung korema alir nem yi agüjang. Parnoki yi jemdakjang aser aser senask tiya amadakjang, aser pa timtem ano tali tebilemtetdaksü. Api 31: 1-7. Ni ama mashimalurtem tang masü Takar, tulartem shirnoki temesepba chiyongtsü pushir parnokji nüji masü parnokji asayatsü oset mesük. 1872 nungi America missionerytemi khrista osang tajung sangoktsür külen nungi asenok tang makili kiyonger kidanger nema sangoktsüti ta jangrapangra alitang Ameriga missionerytem danga tzü adena maotsü ozüng agütsü. Aortem danga songtem saka temeim agi Britishi government ozüng metsüpue Tzüla ayonglang len nungi miima Anüdokleni oa Yisu osang tajung sangoktsüba jungaka mejungaka pelaka mepelaka tanü asangsang angur. Yamaji America nunger dang pelaba sayua tanüpo asen Aotsür Aor janu America len aser England len Pastor aser sayusünger aika oa aliba ya Tsüngrem temoatsü, nenoki onok nüji kümdaksüogo ta Tsüngrem tenüng asangba sangoktsür. Aji tang masü tetsüputsü lima aika nung oa Tsüngrem tenzükbaji ya asenok nem ochi metetdakja nüji kümdaksüba kuli lir. Anungji Tsüngrem lartemi kotak angutsüsa timtem jendi arema ochi nung merükmerüka tenzübaji khrista asoshi aser tasübaji tajanzük. Israel nungeri Tsüngremi ashi mangaba ajanga Flistia nunger ket nung küm lir agütsü, saka Tsüngrem mulung meyipba parnok kümsüksü Samson shimtet saka pai mulungba tang inyakba mechi Flistia nunger ket nung pa asü. Kilep ya senzüa lia züksetbo tachitsü tajung saka pa ki nung ali tua aotang metepset junge pa nem ngudaksüra pai natsü ajemer aser she tako akümer aser tachi majunge indoker. Air asangurtem-a kangsa mangatetter dang kileb she amani ta tsürapori jembia arur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yirusalem nung süia aoba benjung nung nisung 30,000 aden

Jerusalem, April 29 (Agencies): Tang Israel nung rara aser Middle East nung raraba olulu kanga prokba mapang ka süika Yihuda nung meyirjang aika Western Wall nung adenshia sarasademba den külemi temoatsü meshiogo.

Ibri oshi nung 'Birkat Hacohehim' ta ajaba 'Putir temoatsü' ya süia aoba benjung den sendaktepa lir. Yihuda nungeri talisa Hamas teloki pua aliba Israel nungertem meyipa arutsü aser Israel nung yimjung atema sarasadem.

Alima tesem balala nungi Yihuda nungertem adenshia temoatsü meshi aser takümba parnok rongnung Hamas teloki puer aoba kinüngertema liasü.

Yaküm October 7 nü Hamas teloki Israel amakba mapang nung Sigi Cohen'er jabaso, Eliya-a yiruba sülen Hamas teloki puer ao.

Osangbener den jembidang Cohen-i, "Temoatsü meshitsü atema onok Kotel-i aru, kechiyong Eliya ya Cohen ka (putir nungi jakzükba) aser takümba pai iba sentong nung shilem agitsü atema marutet, anungji Western Wall nung tesayuri onok jaoka liasü," ta metetdaksü.

Laishiba nung Züngdangba kaket nung Israel chirtem moatsütsü atema Tsüngremi Mosa aser Aron ne nem item o agüja liasü- "Kibubai na moajang aser nüka liang. Kibubai Pa tejak nü dak yalokjang aser nü dang yimlibilem sayuang; Kibuba tejak nü tsütsüi meyipdajang, aser nü nem tesünap agüjang." (Züngdangba 6:24-26).

Aron sarasadem mesüra temoatsüji Yihuda nungeri anogo shia sarasademba shilem ka lir

aser küm shia loktiia Western Wall nung sarasadem; Sukkot benjung nung aser süia aoba benjung nung sarasadem.

Putirtem azü nungi jakzükba, ta züngshiba Yihuda nungertem Israel nung moatsütsü atema arur aser Western Wall nung sarasadem.

Westeren Wall nung tesayur (Rabbi), Shmuel Rabinowitz-i April ita tetenzükalen Iran-i missile aika amshia Israel amakdang Israel kümzükba atema Tsüngrem nem tenüngsang agütsü.

Shmuel-i, Tsüngremi Israel nung Egypt nungi anitetba mapang nung Israel atema sayatenya aika inyaka liasü, anungji Israel-i kanga pelatsüla, ta ashi.

Paisa Tsüngrem dang Israel dang jashiba agienang, ta mepishia liasü.

ANOGO ABEN TSÜNGREM DEN

TEMULUNGJANG TERAKSA KIBUBAI AGINÜR

...pa den ajemalur tanela tasen kümdaktsütsü aser temulungjang teraksapur tasen kümdaktsütsü. ~ Isaia 57:15b

Temulungjang teraksa tetezü, pei teyanglur Tsüngrem madang tila küma ajemalua, ni temenen nisung ta pei tai temenen Tsüngrem dang nangzüka tanela nung teti merüktetshia alitsü merangba tamanger ka dang ajatsü akok. Temulungjang teraksa den Kibuba madangi arua tanela merüktetshiba majangshi tashi tamanger ka iba lima temenen tashi tarakmokba ajak nungi kodanga pilaa merüka meshia alitsü makok. Yamaji taküm ka merüktetshiba makai tanela tasen küma tamang jenjang temaba aser tabensaba dangi kodakaang aientsü makok.

Mathi 5:3 nung reprangra, Tanela nung anünga alirtem asoshi alimai kodanga magütsütettsüba temoatsü tenangzükba ka zülua angur, aser aji "Kotak Yimli" parnok meyong kümdaktsütsü. Kotak yimli ya ali rongsen tulu, hon taribi sentilong dang karbo, item jagi alizüka senmang amangtsü tesem ka masü. Oda angati dang, saka temulungjang teraksa bener ajemalua Tsüngrem tsüngdang pei menen nangzüka shiri anogoshia tanela nung tasen kümshia jajar, itempurtem nem renemtsüba ki lir.

Temeimbatem, kotak yimli, kotaker ki nung tiatsüsa asen mulungjang teraksa den Tsüngrem anasa teti lir ma? Temulungjang teraksa pai tasen küma yanglushitsütsü, anungji arung ajemalua pa bushidi. Amen

Laishiba ayokba atema China tsür Khristan ka tepuokdak puok

April 29, 2024: China kübok Inner Mongolia province nung aliba court kati Protestant Khristan ka küm 5 tepuokdak ayutsü obendang agütsü.

House church ka tenüng nung Khristan, Ban Yanhong-i ozüng alema Laishiba ayokba atema court-i la aitsü, ta osang ka ajanga metetdaksü.

Mongolia province yimtiba, Hohhot nung aliba Huimin District Court-i, Ban Yanhong-i Khristantem dang ozüng alema Laishiba yokogo, ta aitsü.

Inner Mongolia nung Khristantem nem Laishiba lema agütsüba atema Ban Yanhong densema Khristan 10 apu saka tangartembo chiokogo.

Ajisüaka parnoki, "Onoki Jiangsu province yimtiba, Nanjing nung organization kati ozüng kübok adokba Laishibatem alizük, anungji onoki aibelenameinyak," ta metetdaksa liasü.

Osang angazükba agi iba organization ji China nung Communist sorkari melaba Three-Self Church nung register süa mali.

Khristantem atema ken o jembitsürtemi court dang, Laishibaji ozüng alema masü, anungji China nung ozüng kübok Laishiba ayokbaji ozüng alema inyakba masü, ta ashi.

Parnokisa, Khristantem Laishiba ayokba nungjagi senotsü tajangzük kecha mangur saka takoksa ang angur, ta metetdaksü.

"Laishiba ayokbaji tajangzük angutsü atema masü saka osangtajung proktsü atema lir, kechiyong parnoki Laishibaji jenjang shilem 95 agi alizükba sülen shilem 20 ajemer shilem 75 agi dang ayoker," ta Khristantem atema ken o jembitsürtemi metetdaksü.

Ban Yanhong kinüngbu, Ji

Heying-i, iba telok nungji pa kinüngtsü tongti ama züngshia tangar chiokyonga labo mechiok, ta metetdaksü.

China nung Communist sorkari Arogotem dang Three-Self Church nung register asütsü tuyur, aser register masüba Arogotem (underground churches) reshikangshir.

China linük temzüng ajanga yimsü temeden agütsür aser linük nung ozüng kübok yimsü pongu-Buddhism, Taoism, Islam, Catholicism aser Protestantism dang agizüker.

Ajisüaka Chinese Communist Party (CCP)-i ozüng aika yanglua item ozüng kübok yimsü balala azüoker aser mita repranger.

Tang aliba nung Khristantem alitsü linük tamajungtiba 50 rongnung China ya jenjang 19buba nung lir (Open Doors World Watch List).

Tuli Lenten Baptist Arogo nung Lanujen Waden sentong agi



Impur, April 29 (TYO): ABAM Literature & Education Ministry ajanga Khristar wadang nütsüngsüba nung kanga temulung agüja tanurtem asoshi sentong akaba rongnung Lanujen Waden ya ka lir, ajioda 2023 nungi zone lemsar agia arudar aser Zone 4 asoshi Rongchii 26-28, 2024 anogotem nung "Kümdangdi" Kolosi 2:8 omen süir Tuli Lenten Baptist Arogo nung iba sentong kanga dang junga agiogo, ta ABAM Executive Secretary, Rev. Dr. Mar Pongener-i sangdong ka

ajanga metetdaksü.

Sentong nung tayongzükba O jembir Dr. Moanungsang Tzüdir, Secretary, Education & Literature ABAM ajanga tanü tanurtemji asüng asoshi metsü tajung shiteta ayuba aser nükla tajung ayuba, ta angateta Ministry ajanga kanga nendaka sayua arur aser aika temoatsü agia arudar, anungji iba ministry ya tarutsü putu asoshi teimla ta angateta bendanga agüja sayutsü ayongzük.

Sentong nung onük jembirtem Mrs. Temsüla Along, Director & Founder of Children

Counseling Ministry, Dimapur, Mr. Imsentiba Jamir, Coodinator, Sunday School Ministry, ABAM, aser Mrs. Abenla Aier, Coordinator, Children Ministry, ABAM nung liasü.

Extravagenza Event ka liasü aser iba sentong nung Special appearance Mr. Temsümongba Jamir, Alempang liasü. Tesayurtem asoshi Tsüngrem den jurila sensaksem mapang agiba mapang ka agi aser iba mapang Mrs. Abenla APCE, Kangtsüng BA ajanga lenia temoatsü agi.

Iba sentong nung Arogo 15 nungi delegates 627 arua aden. Tuli Lenten Baptist Arogo ajanga iba sentong achaayangba asoshi pelaba lemsateper.

Iba sentong nung tongtipang mapang ka agibaji "Omni Sophia, Children Bible App" asen Ao oshi nung adokba Dr. Moanungsang Tzüdir, Secretary, Education and Literature, ABAM ajanga sayaa liasü. Iba App ajanga tanur kati Tsüngrem O angaba dang masü saka azüngtsü asoshi Laishiba nungi otsü kar agiteta inyaka arugo.

Tekaraba nung App ji Playstore subscription angutsü imla atar. Mapang apir App ajanga otsütemji update asütsü. Iba App nung otsü renema azünger aser teyariteper Associate Pastor Christian Education tem nungi 12, Arogo & Mungdang lenla balala nung inyaker 14, App developer 1 ajak agi nisung 27 tashi agi yaritepa adoker. Iba app ya mapang tatsüka tsüngda nung ajaki download süa amshitetsü sarasadema atar, ta kasa sangdong ajanga metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Süngkolak

(n) süngdong tema talaktiba (top of a tree)

* Süngkolak nung tenem ozü atemer.

Süngkolongko

(n) nükdongnükra, asotsü makokba süng teperep (hard log)

* Süngkolongko asodang pu kanga raksar.

OLONG PAITEP # 6772

1		2				3		4		5
				6						
	7		8							
9					10			11	12	
			13		14	15				
16					17			18		
				19	20					
21		22								23
24										

TIPIEN

- 1. Saku - (4)
- 6. Songjen - (7)
- 7. Mali/Tazüng - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. _ _ _ tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6771 TELANGZÜBA

TIPIEN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.

NAI-A YA METETTER MA

SÜNGDONG TEIMTIBA DAK AZÜITBA



Ghana nungi environmental activist aser forestry student kati ghonda ka nung süngdong teimtiba dak azüitba otsü tasen ka yangluogo.

Arishi küm 29 tain Abubakar Tahiru-i ghonda ka nung süngdong 1,123 dak azüita liasü. Pai iba ya Alabama nung aliba Tuskegee National Forest nung inyaka liasü. Abubakar ya Tapa, Ghana nung aluyimertem den inet aser Forestry nung undergraduate degree azüngba sülen yaküm nungi Alabama, USA nung aliba Auburn University nung azünger.

Garo Hills nung tanur tetsür ana dak tashiyim inyaker 9 apu



National Commission for Protection of Child Rights (NCPCR) chairperson Priyank Kanoongi-aniba teloki tanur tetsür kinungertem den ajurutepdang agiba noksa ka angur.

Shillong, April 29, 2024

(Agencies): April 16, 2024 nü South West Garo Hills (SWGH) district nung tanur tetsür ana dak tashiyim agi shi nung medemba ken o dak sendakba nung Meghalaya police-i nisung 9 puogo.

"April 16 nü Chenga Benga Mela nung tanur tetsür ana pur aoba, teka sangshiba aser loktii tashiyim agi shi nung medemba

dak sendakba nung ken o benoker bushisüngdang südar" ta SWGH SP Vikash Kumar-i ashi.

Lendong atalokba tesem nungi kulitem bendenogo aser tanur ana dang asüngdangyba, medical examination reports aser tanga kulitem ajanga nisungte puogo ta pai ashi.

Police-i pua alir ajak ya Assam kübok Teporpara nunger

lir aser iba yimtsüng ya Chenga Benga Mela amongba tesem anasa lir.

April 28, 2024 nü chairperson Priyank Kanoongi-i anir National Commission for Protection of Child Rights (NCPCR) telok kati tanur ana kinungertem den ajurutepogo.

Iba tatalokba nung Rohingya nunger dena alitsü ama bilemer ta Kanoongi-i ashi.

BJP-i Muslim nunger votes 20% angutsü meranger: CM Sarma

Guwahati, April 29, 2024

(Agencies): Western Assam aser Guwahati Lok Sabha menden pezü nung polling agitsü atema renemteper.

Bharatiya Janata Party (BJP)-i voters ajuruteper aser talisa Muslim nunger dak rangloker mapa inyaker ta Chief Minister Himanta Biswa Sarma-i ashi.

BJP-i Muslim vote bank nungi shilem tuluka angutsü meranger. Assam nung polling agiba Lok Sabha constituency tem nung Muslim nungeri

tesadang kati BJP nem vote enoktsüogo ta CM Sarma-i ashi.

BJP indang agenda nung Muslim nunger ajangzüktsü ajitetba agi onok nem votes enoktsü. BARPETA aser Guwahati Lok Sabha constituency tem nung BJP den yaritepertem atema nüboyimtsür, ta paisa ashi.

BARPETA nung sentong ka nung jembidang CM Sarma-i Congress lenir Rahul Gandhi aitsü.

Prime Minister Narendra Modi ketdangsüba kübok aika

ajangetogo aser Rahul-i ibaji memeneptsü ta Sarma-i ashi.

Modi'er sorkarisa Northeast nunga mapa aika inyaker aser Bodo o Karbi movements amala ajema kümdaktsür terenlok mapatem inyaker ta Assam CM-isa metetdaksü.

Election agiba sülen sorkari Women Self-Help Groups (SHGs) tashi itdaksütsü aser BJP sorkar agenda nung decentralization aser women's empowerment kanga tongtipang lir, ta Himanta Sarma-isa ashi.

Tripura BJP MLA Nath nem show-cause notice agütsü

Agartala, April 29, 2024

(Agencies): Tripura nung Bagbasa assembly constituency nungi BJP MLA Jadab Lal Nath-i model code of conduct (MCC) alema inyaksangshiba atema show-cause notice ka agütsüogo.

Tripura East Lok Sabha constituency nung April 26 nü polling asü dang MLA Nath-i polling station ka nung tim masüba inyaker ta tai tonglojka lir.

Iba ya Bagbasa nung booth number 22 nung atalok aser Nath-i booth telungi ai aser tim masüba inyaker. Iba tatalokba ya Tripura chief election officer (CEO) office-ia agizükogo.

Yaküm March ita nunga assembly session agidang BJP MLA Nath-i pa indang mobile phone nung video tamajung repringdang apu.

Ano, April 26 nü polling

anogo nung Tripura BJP lenir Kajal Das-ia polling ketdangsür ka dak teka sangshi.

Iba atema North Tripura district nung assistant returning officer (ARO)-i Kadamtala police station nung first information report (FIR) ka benokogo.

Das aser pa den yaritepertemi booth number 22 nung presiding officer ama ta osang angazüker.



GOVERNMENT OF NAGALAND
DIRECTORATE OF TECHNICAL EDUCATION
Nagaland: Kohima-797004

0370-2270409
0370-2271432

NO.DTE/SCTE/6/2023-24/5772

Dated: Kohima, the 29th April, 2024

NOTIFICATION

The Provisional Merit List of the Candidates who has secured qualifying Marks in the Diploma Entrance Exam 2024 to undergo Fashion Technology and various Engineering & Allied Courses within the State run Government Polytechnics are hereby declared as follows which is uploaded in the Department website <https://dte.nagaland.gov.in> and displayed at all Polytechnics. This Merit List is purely provisional which shall be subjected to Regularization on fulfilment of requisite criteria for those candidates whose HSLC/ Equivalent Results are awaited.

IMPORTANT

- i) Provisional Result : 1st May, 2024
- ii) Issue of Nomination letter: 1st to 6th May, 2024.
- iii) Submission of photo copy Mark sheet latest by 3rd May 2024 for those who appeared Class X /HSLC Exam.
- iv) Failure to collect the Nomination letter within the above stipulated time will result in the cancellation of the Nomination and no further request/complaints shall be entertained.

Sd/-
(Er. VIPULHOU LHOUNGU)
Director



**OFFICE OF THE
LANGPANGKONG KAKETSHIR MUNG DANG**

Langpangkong Students' Conference

H.Q. Chuchuyimlang – 798614. Dist. Mokokchung : Nagaland

Email : Langpangkongkaketshirmungdang@gmail.com

Ref. No. LKM/GS/FEL-05/2024
Date : 29/04/2024

TENÜNGSANG ASER TETUSHI AGÜTSÜR

Langpangkong Kaketshir Mungdang(LKM) Mendenti ajanga asen Langpangkong Tzükong nung-i kaketshir-tem shirnoksa NBSE ajanga agiba HSLC aser HSSLC tatidang nung Kaketshir shirnok-i sa jentipur rungnung-i tematiba(Toppers) jenjang ngutetta, asen Langpangkong nungger ajak nem KONANG bener arutsüba asoshi, alakteta nenok ajak nem TENÜNGSANG aser TETUSHI tulu agütsür :

HSLC



N - Benjungakum Jamir
F/N - Meyitangit
M/N - Moanaro
Village - Merangkong
Rank - Top 9(c) (96.83%)
School - Don Bosco School Tuli

HSSLC (SCIENCE)

HSLC



N - Tiarenla Longkumer
F/N - Moanungba Longkumer
M/N - Imlikumla
Village - Merangkong
Rank - Top 14(e) (96%)
School - St. John's Higher Sec. School Kohima

HSSLC (ARTS)

HSLC



N - Imkongsungit Jamir
F/N - I Korachiba Jamir
M/N - P Imtikala
Village - Merangkong
Rank - Top 17(a) (95.67%)
School - Frenwood School Kohima

HSSLC (COMMERCE)

HSLC



N - Imkongsenla Longkumer
F/N - Moatoshi
M/N - N Tainla Jamir
Village - Changtongya
Rank - Top 17(e) (95.67%)
School - Little Star Hr. Sec. School, DMR



N - Narola Imsong
F/N - Rongsenwati
M/N - Atula Noklen
Village - Yaongyimsen
Rank - Top 1 (96.20 %)
School - Queen Mary Hr. Sec. School, MKG.
Sub. Topper - Chemistry



N - Marnungtet
F/N - Imoliba
M/N - Moarenla
Village - Mongsenyimti
Rank - Top 4 (95.80%)
School - Queen Mary Hr. Sec. School, MKG.
Sub. Topper - Ao



N - Imemebo Ozukum
F/N - Tulutoshi Ozukum
M/N - Watsumenla
Village - Mongsenyimti
Rank - 8 (94.20%)
School - Holy Cross Hr. Sec. School, DMR

Langpangkong Kaketshir Mungdang(LKM) ajanga iba kesa tatidang nung takok angur-tem ajak nem maneni tenüngsang tulu agütsür. Iba den külemi, shirnok-sa takok mungoteti lir, nenok tamakok nung tezü madang-i nenok azüngba nung takok angutsü mangdang tulu yur meranga azüngtsü asoshi ajungshir.

Temoatsür Tsüngrem-i nenok taküm nükjidong tongtetba lanur ka-ka südakjangma ta LKM sarasadem.

IMLINOK
PRESIDENT LKM
President

Langpangkong Kaketshir Mungdang

MEYITONGPANG
GENERAL SECRETARY LKM
General Secretary

Langpangkong Kaketshir Mungdang

**OFFICE OF THE
MERANGKONG SENSO TELONGJEM
KOHIMA, NAGALAND**

TENÜNGSANG AGÜTSÜR



Sp. Benjungakum Jamir Kr. Tiarenla Longkumer Sp. Imkongsungit Jamir

Merangkong Senso Telongjem, Kohima ajanga konang tetushi aser tenüngsang agütsür.

- 1). Wb. Meyidangit aser Wt. Moanaro na jabaso Sp. Benjungakum Jamir-i HSLC 2024 tatidang nung Top 9 anguba asoshi
- 2). Wb. Moanungba Longkumer aser Wt. Imlikumla na jala Kr. Tiarenla Longkumer-i HSLC 2024 tatidang nung Top 14 anguba asoshi
- 3). Wb. I Korachiba aser Wt. P Imtikala na jabaso Sp. Imkongsungit Jamir-i HSLC 2024 tatidang nung Top 17 anguba asoshi.

Maneni MSTK ajanga Kaketshirtem HSLC & HSSLC 2024 tatidang nung takok angur ajak nem tetushi aser tenüngsang agütsür aser tarutsü nenok wadang nung Tsüngremi manani moajangma ta sarasademtsür.

Sd/-
(Wb. Imlimatsüng)
Tir MSTK

Sd/-
(Wb. Temjentoshi)
Tongti zülur MSTK

UAE aser Ukraine na shishilembaba tsütsü tenangzüktepba yanglu

Abu Dhabi, Rongchii/April 29 (Agencies): United Arab Emirates aser Ukraine na bilateral trade deal atema sensaksem tembangogo, ta tenangzüktepba nung sign masü tsüngda linük ana yagi külem sangdong ka ajanga Hombarnü metetdaksü.

Comprehensive Economic Partnership Agreement ajanga oset aika nung tariffs tajemba kümdaktsütsü mesüra agintsütsü, shishilembatsü atema tetsükdaktsü alibatem agintsütsü aser linük anaprongla nungi shishilembartem shishilembadak balala nung sadem sadema ajemoka inyaksangshitetsü, ta kasa sangdong ajanga metetdaksü.

Iba den bendenloksema CEPA ajanga, Ukraine nung tongtibang industry aser infrastructure tem yanglushitsü atema teyari agütsütsü aser ano jang, machinery aser metal amala supply asüba tezü tashitaitba kümdaktsütsü.

Ukraine aser Russia na rara nung anüolen aliba linüktemi Russia sentoka toktsütsü atema UAE nongshia arudar, ajisüaka parnoki shinga pumesemi arudar. Russia ya OPEC nung UAE den külemi densema lir. Linük ana tsüngda 2022 küm

tatemlen nungi shishilembaba tsütsü tenangzüktepba ka yanglutsü atema sensaksema aruogo.

UAE-Ukraine bilateral non-oil trade ya 2023 küm USD billion 385.8 ajung aser logistics & infrastructure, travel & tourism, aser advanced technology amala sector balala nung senteper shishilembaba balala inyakba 2022 küm tatem tashi nungbo USD millino 360 junga liasü.

Russia den rara ajanga Ukraine rongsenketzung kanga mejungi kongshio, ajisüaka tarutsü dak rangloker UAE-i jenjang agidar.

"Ukraine taruba putu atema onok renema ataner," ta UAE minister for foreign trade Thani al Zeyoudi-i Reuters dang ashi.

"Europe nung shishilembatsü atema Ukraine ajanga kishi ka lapoktsü asoshi onok atema iba ya tongtibang jenjang ka lir," ta Zeyoudi-i ashiba den, iba tenangzüktepba ajanga oset atema dang masü saka services atema dena lenmang lapoktsütsü aser Ukraine EU nung denra mesüra kodang dentir indangji UAE indang company tem European Union den sendakteptsü asoshi temelaba agütsütsü, ta shisem.

Israel-i Rafah amakba US-i dang soita yutettsü: Palestine PM

Riyadh, Rongchii/April 29 (Agencies): Israel-i Rafah yimti amaktsü aliba soita yutettsüba linükji US dang lir, ta Palestine Tir Mahmoud Abbas-i ashi. Rafah yimti ya Gaza south tsütsü lir aser yangji nisung million ka dak tema jenoka lir.

Rafah yimti amakba ajanga Palestine nungertem Gaza yutsür jena aotsü, ta occupied West Bank shilem kar nung yimsü asüsang Abbas-i ashi. 2007 nungi Hamas-i yimsü süa aruba Gaza nungya Palestinian

Authority mali. Israel-i Rafah amaktsü maneni jembia arur.

Deobarnü Israel Ato Kilonser Benjamin Netanyahu den phone ajanga jembidang US Tir Joe Biden-i Rafah dak sendakba nung pa tangatetba nenshia aser tejangja shiogo.

Civilian tem meyrutsütsü sentong tajung ka mongui Israel mitkari Rafah nung military operation agiba meyaritetsü, ta US-i aiben shiogo.

(Maneni tapak 8 nung...)

Kenya nung tzünoktang rakpok, nisung 42 asü

Mai Mahiu, Rongchii/April 29 (Agencies): Kenya nung Rift Valley jila anasa tzünoktang ka rakpoka nisung 42 asü ta yangji aliba governor-i osangbener dang Hombarnü ashi.

Nakuru county nung Mai Mahiu anasa tzünoktang rakpokba ajanga nisung aliba ki aika nungzüker ao aser lenmangtem raksatsü, kong nisung takum kumzüktsü bushia jana-reja yateta bushir.

"Nisung 42 süogo aser ibai melenshitsü akok. Mulushi agi nembanga lir, aser onoki itemji agitettsü meranger," ta Nakuru governor Susan Kihika-i ashi.

Hombarnü tzünoktang raksaba ajanga March-May tsüngta tzüngluruba mapang nisung asüba 120 jungogo, kong El Nino weather pattern den meyojteper East Africa nung tang tzünglu aruba ya akhi mapang dang nungi kanga agi tesashiba lir.

Ano Kenya anüdoklen Tana River county nung hopta tatemlen nisung aika bena aliba rong ka mükepokba nungi nisung tasü mang ana ngutetogo aser nisung 23 takum kumzüka

lir, ta Kenya Red Cross ajanga Hombarnü ashi.

Video footage ka online nung lemsatepba aser television nung sayuba nunga nisung sünga mena aliba rong ka tzü telungi aludang nisungtem tetsübo nung jeptepe liasü aser tezülen nungi dangartem tetsübo aser taoksa nung repranga liasü.

Kenyan nung March ita nungi tenzüka nisung 76 takum samaogo, ta ketdangsürtemi Honibarnü ashi.

Ajungben tzümetsüng adokba ajanga lenmang aser kiyong balala metsüngbanga kibong 24,000 shi nungi nisung 130,000 dak tema pei ki yutsür tesem balala nung jenoka lir aser timba linük yimtiba Nairobi nung lir, ta sorkari Honibarnü ashi.

Tanen makai tzünglu kanga sashia aruba ajanga school tem küm tiyong nung sodi aliba hopta ka atsülanger ta education ministry ajanga Hombarnü sangdong.

"Kaket reju kar nung tzünglu ajanga kanga sashia kongshia lir aser mera tajung ka magi tashi kaketshir aser

tesayurtem takum lendong nung metoktsütsü," ta Education Minister Ezekiel Machogu-i ashi.

Taküm iba meyi tzüngluru yagi kidanger Tanzania linük nunga timtem jenti agütsür, kong tzümetsüng aser anentsüh agi nisung 155 takum samaogo.

Alima nung tesensaktiba lima, Burundi nung it aka dak tali tzünglu tanen makai aruba ajanga nisung 96,000 dak tema pei ki yutsür tesem balala nung prokshia lir, ta United Nations aser sorkari ita tetenzüklen shia liasü.

Uganda nunga yipru tesashi arua ayongpang nungi tzü muteta adoka nisung ana asü aser yimtsüng noklang dak tema azüngtettsüsa akum.

Kenya kübok Nakuru county nungsa Solai nung küm trok tejakdang tzünoktang ka chirepa nisung 48 asü.

El Nino ya pasasa adokba tzüngsang mopung ka lir, aser talisa alima nung tatsük tali akumba ajanga adoker, aser iba yagi alima tesem kar nung tzüngsarusa alir aser tesem kar nung tzünglu kanga sashia arur.

Thomas Cup: India team quarterfinal-i iogo

Rongchii/April 29, 2024 (Agencies): Chengdu nung tang asaya aliba Thomas Cup nung iba asayamung tesüsa koker aliba India team-i Hombarnü Group C nung England team 5-0 agi koka knockout stage tongogo.

Mezüngbuba asaya nungi India team-i Thailand team 4-1 agi akok aser tang England koka quarterfinals-i iogo.

Hombarnü mezüngbuba kija asaya nung HS Prannoy-i 21-15, 21-15 agi Harry Huang koka India 1-0 agi tejakdang aküm.

Tarep asaya mezüngbuba

nung Satwiksairaj Rankireddy aser Chirag Shetty nati set asem tashi kanga toktepa asayaba sülen Ben Lane aser Sean Vandy na 21-17, 19-21, 21-15 agi koka liasü. Team ana tsüingda ghonda ka set minute pongu asaya liasü.

Taoba world number one asayar Kidambi Srikanth-i kija asaya tanabuba nung 21-16, 21-11 agi Nadeem Dalvi koka India 3-0 agi tejakdang aküm.

"Iba asayamnung nung asaya anaprongla koktetba atema pelar. Asaya akoktsü atema asayartem asoshi pressure aika alir. Ni tang tashi

nung opponent kanga tashi tait denbo asaya mali. Ajisüaka tang nungibo onok asayar tajungtem den asayatsü aser ni takokba tashi tajungtiba asayatsüla," ta Srikanth-i ashi.

Kasa mapang nung tarep asaya tanabuba nung MR Arjun aser Dhruv Kapila nati Rory Easton aser Alex Green na 21-17, 21-19 agi koka liasü.

Tatembangbuba asaya nung arishi küm 24 tain asayar Kiran George-i 21-18, 21-12 agi Cholan Kayan koka liasü.

Bodhbarnü group fixture tatembangbuba nung India team Indonesia den asayatsü.

Williamson lenisüba nung New Zealand team T20 World Cup asayatsü

Rongchii/April 29, 2024 (Agencies): June ita asayatsü aliba Twenty20 World Cup atema New Zealand team sangdongogo. Team nung asayar 15 densema lir, koba Kane Williamson lenisüba nung asayatsü, aser asayar tejen Tim Southee-a shimogo. Williamson tang agi Twenty20 World Cup trokbuba nung asayatsü lir.

Iba asayamung ya United States aser West Indies na nung June 2 nungi 30 tashi asayatsü. Williamson tang agi pezübenbuba captain ama asayatsü aser Southee tenetbenbuba asayatsü lir.

Arishi küm 35 tain Southee-i otsüsüsüsa T20 international wickets 157 agir lir aser pa aser Trent Boult nati anir pace bowler tem asayatsü. Boult-a T20 World Cup pongububa nung asayatsü lir.

Team nung seam bowler Matt Henry aser batting all-rounder Rachin Ravindra na dang tang mezüngbuba T20 World Cup asayatsü lir.

"World Cup asayai aoba mapang asayar tejentem anir

oner," ta New Zealand head coach Gary Stead-i ashi.

Taoba World Cup asem tashi semifinal tonga asayaba aser 2021 küm final tonga asayaba sülen New Zealand pur mezüngbuba world Cup akoktsü merangdar.

Kasa mapang nung seamer Adam Milne aser Kyle Jamieson na yiruba ajanga team nung mezüngoksem.

Seam bowler tem rongnung Trent Boult aser Lockie Ferguson na den Ben Sears masü saka Henry shimogo.

Team nung züingsem 15 nungi 13 bo Caribbean nung oa asayaogo. Parnok tesüsa 2022 küm West Indies nung oa asayaogo.

T20 World Cup atema New Zealand squad:

Kane Williamson (captain), Finn Allen, Trent Boult, Michael Bracewell, Mark Chapman, Devon Conway, Lockie Ferguson, Matt Henry, Daryl Mitchell, Jimmy Neesham, Glenn Phillips, Rachin Ravindra, Mitchell Santner, Ish Sodhi, Tim Southee.

Lahore, Karachi, Rawalpindi nung Champions Trophy asayatsü

Rongchii/April 29, 2024 (Agencies): Pakistan Cricket Board Hombarnü Karachi, Lahore, aser Rawalpindi nung Champions Trophy ayongzüka asayatsü atema telemtetba agiogo.

Iba asayamung nung India shilem agidaktsütsü atema 'hybrid model' ka benoktsü akok ta jembidar, ajisüaka board-i asayamung nung asaya ajak linük nung dang asayadaktsüner.

Champions Trophy ya tatembangsa England nung 2017 küm ayongzüka asayaogo, aser taruba asayamung ya taruba küm February-March nung ayongzüka asayatsü renema lir.

India-i iba asayamung nung shilem agitsü magitsü tang tashi osang agüja mali aser Pakistan-i aotsü atema sorkari team nem temelaba magütsüra

ICC-i 'Hybrid Model' ka benoka India team asaya neutral venue ka nung asayadaktsütsü akok. ICC-isa, sorkar inyakyim anema inyaktsü asoshi züingsem shinga danga masüingdangtsü ta jangja jangja metetdaktsüogo.

"ICC Champions Trophy atema Pakistan nung asayatsü aliba asayatem atema mapanglem yokogo," ta PCB mendenbuba Mohsin Naqvi-i ashi.

"ICC security team arua onok senden kanga junga menogo. Parnoki idaki inyakyimtem asadangogo aser onoki stadium tem ajungkettsü atema sentong aliba lemsatepogo.

"Pakistan nung asayamung kanga junga ayongzüka asayatsü atema merangdar," ta Naqvi-i ashi.

India shilem agidaktsütsü atema kecha memelenshitsu, ta


PCB-i shia arudar.

'Hybrid Model' ya taoba küm Asia Cup asayaba mapang benokogo. Asia Cup ya Pakistan nung ayongzüka asaya ajisüaka BCCI secretary Jay Shah tekolak sür Asian Cricket Council-i India team asayatem Sri Lanka nung ayongzüka asaya-a liasü.

Naqvi-isa, asayamung ayongzüka asayatsü atema benokdanga aliba venue asemprongla ya international cricket asaya ayongzüka asayatsü atema tangbo kangabo tapet masü ta shiogo.

"Stadium nung facility tem ajungkettsü nüngdaker. Karachi nung stadium jenjang kanga mejungi lir. Anungji May 7 nü onoki international company tem bid tembangba sülen shirnoki stadium yanglushitsütsü aji jangjatsü," ta pai ashi.

Madrid Open 2024: Alcaraz aser Aryna na pre-quarterfinals-i iogo



Rongchii/April 29, 2024 (Agencies): Madrid Open tebur kija asaya nung Deobarnü Carlos Alcaraz-i 6-3, 6-3 agi Thiago Seyboth ayong ayonga kokogo. Iba asayamung anaben atonga koker aliba asayar ya round of 16 nung Jan-Lennard Struff den asayatsü.

Alcaraz, shiba teka yiruba ajanga ita ka masayateti liasü, pa iba asaya nung minprong kecha makai asaya aser pai asaya yimya dak kanga temulung asüba lemsatepogo. "Tanü tetandangba ka liasü. Ni timtem kecha mali aser kanga jangradema bilemer. Idak nungi

ni tajungba kuma aotsü," ta pai ashi.

Tebur kija asaya tanga ka nung Alexander Zverev-i 6-4, 7-5 agi Denis Shapovalov akok aser Andrey Rublev-ia mezüngbuba set tie-break nung 5-0 agi tesülen aliba nungi meyipa atur Alejandro Davidovich Fokina 7-6 (12/10), 6-4 agi koka liasü.

Tetsür asaya nung world number two Aryna Sabalenka, arishi küm 19 tain Robin Montgomery den kanga toktepa asayaba sülen 6-1, 6-7 (5/7), 6-4 agi takok nguogo. Tena ghonda ana sür tesimalang asaya

liasü.

Asaya tembangba sülen Sabalenka-i Montgomery nem tenüngsang agüja liasü. "Iba asaya akokba atema ni kanga pelar. Lai kanga junga asayaogo," ta lai ashi.

Maneni world number four asayar Elena Rybakina-i 6-1, 6-4 agi Mayar Sherif koka round of 16 tongtetogo, kong la Sara Bejlek den asayatsü.

Tetsür kija asaya nungsa Mirra Andreeva shiba Hombarnü arishi küm 17 jungogo, lai 7-5, 6-1 agi Wimbledon champion Marketa Vondrousova kokogo.

BENDANGLI OSANG : Tapak 7 nungi...

Israel-i Rafah amakba US-i dang...

Saudi Arabia yimtiba Riyadh nung World Economic Forum (WEF) sentong ka nung jembidang Abbas-i US dang soita ayutsü ajungshia liasü.

"United States of America dang Rafah nung operation agiba anentsü Israel dang ashitsü onoki ayongzüker, kechiaser Israel-i iba mapa tamajung inyakba nungi nokdangtsü tashi aliba linükhi America ya dang lir," ta pai ashi.

Rafah nung tesem tilaka dang amak nunga Palestine nung Gaza Strip yutsür ajentsü aser Palestine nung puti otsü nung timtem tulutibaji ataloktsü, ta pai ashi.

Gaza nütüing yongsük tesimalang dak tema Rafah nung jenoka lir, kong nisung tali adenshiba den chiyongtsü, tzü aser mozü agi kanga anünger.

US Secretary of State Antony Blinken-a Riyadh tonga arua lir, kong pai Abbas den jembishinü alitsü.

Külen ceasefire aser Gaza nung pua aliba taoba mapang chioker anünga aliba chioktsü atema Israel aser Hamas

tsüingta dangar ajanga jembishinüba nung terenlok kar liasü, saka Israel indang coalition sorkar nung telemsa tali adoker.

War cabinet züingsem aser opposition lenir Benny Gantz-i pua alirtem kidangi meyiba arudaktsütsü asoshi tezüingzüktep tajung ka meyanglutetra tang aliba sorkari ya alitsü temeden maka, ta Deobarnü shia liasü.

" Hamas anema mapang talangka raraba nung Rafah-i aitsü ya tongtipang. Pua alirtem meyiptsütsü ya kanga agi tongtipangtiba aser tang inyaktsü mapa lir," ta Gantz-i X (Twitter) nung ashi.

Rafah amaktsü aliba thir tezüingzüktep ka agizük nungbo sorkar anentsüla, ta far-right Finance Minister Bezalel Smotrich-i ashi.

Israel-i October 7 nü nungi tenzüka Gaza amakba nung Palestine nung 34,488 tepsetogo aser 77,643 yirua lir, ta Gaza indang health ministry ajanga Hombarnü sangdong ka nung ashi.

Tesüiba ghonda 24 tsüingta nisung 34 tepset aser 68 yiru, ta sangdong ajangasa ashi.

BILEMDANGANG
"Mapa tilika dang süaka temeim agi inyakang."